

ORDENANZA REGULADORA DA TAXA POR SERVIZOS DE MATADOIROS, LONXAS E MERCADOS, ASÍ COMO A CARREXA DE CARNES, SE HOUBERA DE EMPREGARSE DUN XEITO OBRIGATORIO, E SERVIZOS DE INSPECCIÓN EN MATERIA DE ABASTOS, INCLUÍDA A UTILIZACIÓN DE MEDIOS DE PESAR E MEDIR

Artigo 1º. NATUREZA E FUNDAMENTO

No uso das facultades concedidas polos artigos 133.2 e 142 da Constitución, polo artigo 106 da Lei 7/85, do 2 de abril, reguladora das bases do réxime local, e os artigos 20 e 58 da Lei 39/88, do 28 de decembro, e de conformidade co disposto nos artigos 15 a 19 da Lei 39/88, do 28 de decembro, acorda a imposición e ordenación da **Taxa por servizos de matadoiro, lonxas e mercados, así como a carrega de carnes, se houbera de empregarse dun xeito obrigatorio, e servizos de inspección en materia de abastos, incluída a utilización de medios de pesar e medir.**

Artigo 2º. FEITO IMPOÑIBLE

Constitúen o feito impoñible da Taxa a prestación dos servizos de matadoiro, lonxas e mercados, así como a carrega de carnes, se houbera de empregarse dun xeito obrigatorio, e servizos de inspección en materia de abastos, incluída a utilización de medios de pesar e medir.

Artigo 3º. SUXEITOS PASIVOS

- Serán suxeitos pasivos contribuíntes as persoas físicas ou xurídicas e as entidades ás que se refire o artigo 33 da Lei xeral tributaria que soliciten ou resulten beneficiadas ou afectadas polos servizos ou actividades que se detallan na tarifa da taxa.

Artigo 4º. RESPONSABLES

- Serán responsables solidarias das obrigas tributarias dos suxeitos pasivos as persoas físicas e xurídicas ás que se refiren os artigos 38.1 e 39 da Lei xeral tributaria.

- Serán responsables subsidiarios os administradores das sociedades e os síndicos, interventores ou liquidadores de quebras, concursos, sociedades e entidades en xeral, nos supostos e co alcance que sinala o artigo 40 da Lei xeral tributaria.

Artigo 5º. COTA TRIBUTARIA

A cota desta taxa será a que figura no anexo desta ordenanza.

Artigo 6º. BENEFICIOS FISCAIS

Só se admitirán os beneficios que veñan establecidos nas normas con rango de lei ou deriven de tratados ou acordos internacionais.

Artigo 7º. PERCEPCIÓN

A) Cando se trate de servizos non periódicos:

Percíbese a taxa e nace a obriga de contribuír cando se presente a solicitude de prestación do servizo ou actividade.

B) Cando se trate de servizos periódicos:

Percíbese a taxa e nace a obriga de contribuír o primeiro día de cada ano natural, excepto cando se produza a alta no padrón, caso no que a percepción se producirá a partir dese mesmo mes.

Artigo 8º. LIQUIDACIÓN

A) Cando se trate de servizos non periódicos:

- Cando se trate de servizos ou actividades cunha liquidación que se poida cuantificar no momento de presentar a solicitude de prestación, liquidarase nese mesmo momento ou no momento posterior, pero sempre antes de prestar o servizo ou de realizar a actividade.

- Cando se trate de servizos ou actividades cunha liquidación que non se poida cuantificar no momento de presentar a solicitude da prestación do servizo ou da realización da actividade, practicarase a liquidación unha vez prestado o servizo ou realizada a actividade.

- Se se realiza a prestación do servizo ou a actividade sen mediar solicitude, liquidarase e notificarase a taxa tan pronto se detecte esta situación, esixíndose o ingreso nos prazos previstos no Regulamento xeral

de recadación para a liquidación de contraído previo, sen prexuízo de abrir o oportuno expediente sancionador por infracción tributaria.

B) Cando se trate de servizos periódicos:

Practicarase a liquidación única anual ou coa periodicidade que se determine nas tarifas desta taxa.

Artigo 9º. INGRESO

O pagamento desta taxa realizarase:

A) Cando se trate de servizos non periódicos:

- Cando se trate de liquidacións cunha cuantificación que se poida efectuar antes de prestar o servizo ou de levar a cabo a actividade, realizarase o ingreso antes da prestación do servizo ou realización da actividade na Tesourería municipal ou nas entidades financeiras que se sinalen na liquidación.

- Cando se trate de liquidacións cunha cuantificación que non se poida efectuar con anterioridade á prestación do servizo ou realización da actividade, farase o ingreso nos prazos e lugares que se sinalen na liquidación.

B) Cando se trate de servizos periódicos:

- Cando se trate de liquidacións periódicas, nos prazos e nos lugares que se sinalen no edicto de exposición ó público.

Artigo 10º. INFRACCIÓNS E SANCIÓN

Nesta materia estarase ó disposto na Lei xeral tributaria e normativa de desenvolvemento.

Artigo 11º. NORMAS DE XESTIÓN

- As persoas ou entidades interesadas na prestación dos servizos que se citan no artigo segundo desta ordenanza, deberán presentar solicitude por escrito na que se detalle o tipo de servizo e o lugar para o que se solicita e os demais requisitos que esixa o concello.

- Unha vez autorizada a prestación do servizo entenderase prorrogado mentres non se presente a declaración de baixa polo interesado, a non ser que se trate de servizos non periódicos.

- Cando remate a necesidade do servizo periódico, por cambio de propietario, etc., os suxeitos pasivos formularán as declaracións de baixa no padrón da taxa e surtirá efectos no período natural seguinte ó da súa presentación, podendo, no seu caso, prorratearse por meses. A non presentación da baixa determinará a obriga de continuar aboando a taxa.

DISPOSICIÓN ADICIONAL ÚNICA

Cando existan os convenios de colaboración aos que fai referencia o artigo 27.2 da Lei 39/88, do 28 de decembro, os procedementos de liquidación e recadación regulados nos artigos 8 e 9 desta ordenanza cederán ante a regulación prevista nos convenios.

DISPOSICIÓN FINAL

A presente ordenanza fiscal, cunha redacción definitiva aprobada polo Pleno da corporación na sesión que tivo lugar na data que se expresa no anexo a esta ordenanza, entrará en vigor o día 1 de xaneiro de 1999.

A N E X O

Primeiro. TARIFAS

MERCADO DE SANXENXO

Por cada posto grande de carácter fixo da primeira planta do mercado de Sanxenxo, pagarase a cota mensual de.....27,92 €

Por cada posto pequeno de carácter fixo da primeira planta do mercado de Sanxenxo, pagarase a cota mensual de..... 18,61 €

Por cada posto grande de carácter fixo da segunda planta do mercado de Sanxenxo, pagarase a cota mensual de..... 18,61 €

Por cada posto pequeno de carácter fixo da segunda planta do mercado de Sanxenxo, pagarase a cota mensual de..... 9,31 €

MERCADO DE PORTONOVO

Por cada posto do mercado de Portonovo, calquera que sexa o seu destino, pagarase a cota mensual de..... 27,92 €

MERCADO DE VILALONGA

Por cada posto grande no mercado de Vilalonga, pagarase a cota mensual de13,96 €

Por cada posto pequeno no mercado de Vilalonga, pagarase a cota mensual de
.....6,98 €

Por cada metro lineal de bancada, nos mercados de Sanxenxo e Portonovo,
adicado a peixes e mariscos..... 0,90 €/día

Por cada metro lineal de bancada ou mesado, nos mercados de Sanxenxo e
Portonovo, adicado a froitas, verduras e outros 0,75 €/día

Por cada metro lineal, nos aledaños dos mercados de Sanxenxo e Portonovo,
adicados a flores, verduras e outros 0,60 €/día

NOTA: A liquidación da taxa poderá facerse mensualmente, en base aos días de
ocupación.

Segundo. OUTRAS NORMAS DE XESTIÓN

Dereitos de traspaso:

De pais a fillos ou netos ou entre cónxuxes "mortis causa" 6 mensualidades.

Por actos "inter vivos" as concesións de postos fixos nos mercados municipais
poderán ser traspasados polos seus titulares mediante prezo, pero nunca
gratuitamente.

Nos casos nos que se pretenda realizar un traspaso deberá comunicarse,
previamente, ao Concello co nome do novo usuario e o prezo do traspaso. O
Concello terá a opción de quedarse co posto polo prezo que se lle notificara ou a
percibir o 14 % do mesmo e autorizar a operación. Esta opción exercerase no
prazo máximo dun mes contado de día a día, a partir de que teña entrada a
comunicación no Rexistro Municipal, transcorrido dito prazo entenderase

autorizado o traspaso por silencio administrativo e o interesado deberá ingresar o 14 % do prezo ofrecido na Tesourería Municipal para consolidar a operación.

Terceiro. DATA DE APROBACIÓN

Aprobada a súa modificación provisionalmente polo Pleno de 22.08.02 e será de aplicación a partir do día 01.01.03, permanecendo en vigor ata a súa modificación ou derogación expresa.

De conformidade cos artigos 17.3 e 17.4 do R.D.L. 2/2004, de 5 de marzo, polo que se aproba o Texto refundido da Lei reguladora das facendas locais, publíquese o texto da modificación da ordenanza fiscal, para o exercicio de 2019:

Modificación da ordenanza reguladora da taxa por servizos de matadoiros, lonxas e mercados, así como a carrega de carnes, se houbera de empregarse de xeito obrigatorio e servizos de inspección en materia de abastos, incluída a utilización de medios de pesar e medir.

Modificar o anexo de tarifas engadindo unha taxa pola recollida de materia orgánica:

- *Recollida selectiva de materia orgánica por cada posto fixo: 9,00 €/mes.*
- *Recollida selectiva de materia orgánica por cada metro ou fracción de bancada lineal: 3,60 €/mes*

Ditas tarifas terán carácter retroactivo ao 01.01.18.

As presentes ordenanzas entrarán en vigor o día da súa publicación (7-02-19) e comezarán a aplicarse o día 1 de xaneiro de 2018, permanecendo en vigor en tanto non se acorde a súa modificación ou derogación expresa.